



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma :



Tir Yimym



tir_yimym



tir yimym

TAPAK 8



Tesüiba mapang arrtsülen aliba
tesemtem sendoka liasü: Rijiju


World C'ship: Treesa Jolly-Gayatri
Gopichand nati takok angu



VOL. XXIII ISSUE NO. 309 (ADOK 309) DIMAPUR ROGONÜ (FRIDAY) LUROI (AUGUST) 21, 2026

₹ 5.00

Mon Police-i inter-state drug trafficking network putet



Dimapur, Luroi/August 20 (TYO): Mon Police-i state tesem balala nung temesepba mozü shibelenba network ka putet aser heroin (Shan Flower) tuozük grams 800 shi apu, koba tang tashi temesepba mozü anema nokdaker aruba mapang temesepba mozü timtiba apuba rongnung ka alitsü.

Police ajanga ashiba agi, iba temesepba mozü ya Mon nungi Assam nung aliba Sonari-i bener ao aser iba sülen Dimapur-i bener arutsü tebilemba liasü.

Itdangiter osang tejangja kar nung ajemdaker Mon Police-i temesepba mozü shibelenba nung shilem agirtem jangjateta aputsü operation tenzuka iba mozü den nisung asem - Nokteih, Poungying aser Pulei - apu, shirnoki mozü ya Mon nungi yoka liasü.

Pua alirtem den asüngdangyaba sülen Mon police-i Assam nung Charaideo

Police den lungjemer joint operation ka agi aser iba mapang mozü agizüksang, Md. Taher Hussain ya Sonari anasa apu.

Iba sülen Hussain-i yokba Dimapur nung tetsür ana - D. Robila Roziine aser Kaili Aye nati agizüksü liasü, aser tena ya Dimapur Police Commissionerate teyari nung apu.

Anogo asem jungnüa tanen makai operation agiba mapang Mon nung tetenzükdak nungi len tom, Sonari nung intermediate receiver aser Dimapur nung agizüksü alirtem ajunga jangjateta putet, ta police-i ashi.

Mon Police-i iba operation ya Assam aser Nagaland indang Director General of Police aser Anti-Narcotics Task Forces (ANTF) tawabangba kübok Assam aser Dimapur Police den amteper aser parnok teyari nung takok ngua agiteta liasü.

Police-isa nüburtem dang senotsü agütsür, mule account, temesepba mozü abener, couriers, shibelener aser ozüng alema amshiba mozütem rizünga ayuba mesüra ayokba nung shilem agiba nisungtem osang lemsatapa temesepba mozü anema raraba maparen nung yariteptsü ayongzüük.

Assam-Meghalaya arütsülen tensa mejungi lir

Guwahati, Luroi/August 20 (TYO): Assam tsütsü Jorabat tesem nung Meghalaya-registered gari tem anendaktsüba sülen Brehostibarnü Assam-Meghalaya arütsü tensa mejungi akum, koba Shillong nung Khasi Students' Union (KSU) motorcycle rally ka mapang mepetmesü ataloker anogo ka lir iba osang ya angashir.

Bodhbarnü Shillong nung gari aika raksaja civilian tem merenshiba aser sorkar indang gari nung mi senloktüba sülen nüburtem jashitepa aliba mapang gari soitba osang ya arur alitsü. Shillong nung iba mepetmesü mapang Assam registration number aliba garitem nunga tenük yok ta angazüker.

Iba sülen Meghalaya registered gari tem Jorabat ajanga

senzüa alibatem anendaktsü, anungji Shillong nung atalokba tayang kepzüksü südi ta nüburtem tetsübo nung lir.

Iba tatalokba ajanga state ana tsüngda arrtsü nung tensa tali mejungi akümtsü tsübua bilemer, talisa Shillong lendong atalokba sülen state anaprong nungi garitem mesüra passenger tem dak rangloker.

Jorabat ya Guwahati nungi Meghalaya den sendaktepba nung tongtipang transit point ka amai lir aser anogoshi iba tesem ajanga gari, tourists, passenger gari aser commercial gari tem senzür.

KSU-i rally ayongzüükba sülen Meghalaya nung tensa mejungi lir aser Bodhbarnü gari raksaja nüburtem merenshiba anema police temi mera balala agi tenzükogo.

Sorkari nübur asoshi AB PM-JAY, CMHIS nung temulung agütsür

Kohima, Luroi/August 20 (TYO): Ayushman Bharat Pradhan Mantri Jan Arogya Yojana (AB PM-JAY) aser Chief Minister Health Insurance Scheme (CMHIS) indang media sensitisation sentong ka "Enhancing Media Awareness and Public Outreach on AB PM-JAY and CMHIS" omen nung ajemdaker Capital Convention Centre, Kohima nung Brehostibarnü agia liasü.

Iba sentong ya Nagaland Health Protection Society (NHPS), Department of Health & Family Welfare ajanga ayongzüük.

AB PM-JAY ya Government of India ajanga mela-mela aser jenjang talang yong healthcare agütsütsü aser linük universal health coverage tsütsüi renloka aoba nungmesotsü nükjidong nung tenzükba flagship health insurance scheme ka lir. CMHIS ya AB PM-JAY den lokteper AB PM-JAY CMHIS nüngja agütsür amshir.

Department ajanga ashiba agi, March 2026 tashinung Nagaland telungzüük nung CMHIS (Employees and Pensioners) kübok mozüki 64 empanelled süa lir aser state alema oa tesem balala nung mozüki 71 lir.

PM-JAY/CMHIS (General) kübok Nagaland telungzüük nung mozüki 61 empanelled süa lir aser linük nung mozüki 32,500 empanelled süa lir.

Sentong nung Thavaseelan K, CEO, NHPS ajanga jembidang, AB PM-JAY aser

CMHIS indang tali tajungba nung angatettsü nükjidong nung iba sentong ya ayongzüük, ta ashi.

Item scheme kübok nüburtemi teyari komasür agitettsü, ta asüba osang tejangja prokshitsü atema media teinyaktsü tulu lir, ta pai ashi.

Iba den külemi NHPS-ia maneni awareness agütsütsü aser iba sentong ajanga scheme indang mangatetba jangjateptsü aser osang meshidak prokshiba shidak kumdaktsüba nung yaritsü imlar, ta pai ashi.

Iba sentong nung Dr. Yingnei Wangnao, Deputy CEO, NHPS ajanga AB PM-JAY aser CMHIS indang nükjidong, yimya aser tajangzüük lemsatapa liasü.

Livitoli Sukhalu, Deputy CEO, NHPS ajanga iba scheme ana agitsü asoshi eligibility criteria indang lemsatapa aser Alongla Aier, Operations Manager, NHPS ajanga scheme indang policy aser design indang jembia liasü.

CMHIS (General) aser AB PM-JAY kübok FY 2026-27 mapang nisung 2,477 temang anepaluogo aser sen 17,54,54,509 amshiogo, ta parnoki sentong nung ashi. Kasa mapang CMHIS kübok treatments 8,302 agiogo aser iba nung sen 30,86,62,785 amshiogo ta ashi.

FY 2018-19 nungi FY 2026-27 tsüngta CMHIS (General) aser AB PM-JAY kübok sen 251 crore dak tema jenjang treatments 1,35,900 agiogo, ta ketdangsüri sentong nung ashi.

CMHIS kübok FY 2022-23 nungi FY 2026-27 tsüngta treatments 57,557 agiogo aser iba mapang sen 226 crore dak tema amshiogo.

AB PM-JAY aser CMHIS (General) beneficiaries temi küm ka nung kibong shia sen 5 lakh jenjang health coverage agütsür, ta ashi.

CMHIS beneficiaries nungya Government of Nagaland indang employees aser pensioner dena lir, aser parnok küm ka nung kibong ka nungi sen 20 lakh jenjang treatment agitettsü.

Item schemes yagi beneficiaries nem secondary aser tertiary medical aser surgical care atema angati aser sen mamshi mozü kidang munga temang anepaluteter aser pre- aser post-hospitalisation atema follow-up care aser day-care procedures teshimtet kar kasa teyari agiteter.

Ajisüaka item scheme küboki outpatient services aser standalone diagnostic tests maiter.

Item schemes atema nüburtemi toll-free number 1800 202 3380 nung jembitsü akok.

General enquiries atema support-nhps@cmhis.nagaland.gov.in nung tongteprateptsü aser metokmeperi alibatema grievances.nhps@cmhis.nagaland.gov.in dangi yoktettsü.

PM-JAY/CMHIS card mamshiner temi card.support@cmhis.nagaland.gov.in dangi zülutsü akok

NSF-i Dimapur nung BEFR indang national seminar ayongzüüksü

Dimapur, Luroi/August 20 (TYO): Naga Students' Federation (NSF) ajanga Dimapur nung Bengal Eastern Frontier Regulation (BEFR), 1873 indang anogo ana national seminar ayongzüüksü, koba awareness agütsütsü, iba ozüng mapa kuma inyakba nung tashi itshitsü aser Government of Nagaland ajanga agizüka amshitsü asoshi 'consolidate recommendations' agütsütsü nükjidong nung ayongzüker.

Iba seminar ya national-level policy consultation ka amai lir, koba Town Hall, Dimapur nung August 28 & 29, 2026 anogotem ayongzüüksü, ta NSF indang Inner Line Regulation Commission (ILRC) sangdong ka nung ashi.

Mezüng anogo "Academic and Ground Realities" omen nung ajemdaker Inner Line Permit (ILP) system amshiba Nagaland aser tanga states tem nung BEFR

mapa kuma inyakba asadangtsü aser ananü buba "Legal Perspective" omen nung ajemdaker iba Regulation indang temzüngtem asadangtsü.

Iba seminar nung Supreme Court of India indang Senior Advocates Prashant Bhushan aser Shomona Khanna nati Fundamental Rights aser BEFR, 1873 tsüngta tesendaktep aliba aser hill tribes indang temeden wazüka ayuba indang jembitsü.

Seminar nung academic tsütsü shisalen sayur ya Prof. Nani Bath (Rajiv Gandhi University, Arunachal Pradesh); Dr. Lallianchhunga (Mizoram University); Prof. (Dr.) Ch. Priyoranjan Singh (Manipur University); aser Prof. Shantanu Chakravarty (Girijananda Chowdhury University), former head of the Department of Political Science, Cotton University, Assam nungtem alitsü.

Iba seminar nung tribal

Hohos, apex Naga organisations, kaketshir telok balala, NSF federating units, Nagaland Legislative Assemblu züngsemtem, sorkar ketdangsür, bar associations aser Dimapur nung aliba kakat rejutem nungi arua adentsü teimla lir.

Nüburtem atema menden 20 shi yutsütsü, aser iba atema jelia menden makaa ayutsüla. Iba seminar nung adentsü jangra alirtemi ILRC-NSF den ilrc.nsf@gmail.com mesüra +91 8413899928 ajanga August 25 tashinung tongteprateptsüla.

BEFR, 1873 aser ILP system ya state nung lisopur maitsü, ali, customs aser ali rongsen wazüka ayuba nung tongtipang lir asünung, nüburtem, talisa kaketshir temi shilem agitsü ayongzüker, ta parnoki ashi.

Iba seminar nung jembishinüba tongtipang onük tem bendener Government of Nagaland nem agütsütsü.

AIBELENBA TAI NANGZÜKER

Ni, Mr. Nungtet Imti Ozüküm, Mongsenyimti, S/o Mr. Nokenkümzüük Ozüküm, ni Süngratsü nungeri Anishi (Nüoshi) yangluba nung pumkin leaves, sweet potato leaves etc, aser ajinameto, maida itemji inoka yanglur ta Facebook nung zülubaji kangasa tai inyakogo ta tanü 20th August, 2026 anogo Süngratsü Meijensanger Putu matsüngdang nangzüker.

Imti
(NUNGTET IMTI OZÜKÜM)
Mongsenyimti

Angh Nand Kishore-i NIELIT Kohima semdang



Dimapur, Luroi/August 20 (TYO): Nagaland Angh Nand Kishore Yadav-i, August 20 nü National Institute of Electronics and Information Technology (NIELIT), Kohima semdangogo.

NIELIT semdangba mapang Angh-i Academic Block nung infrastructure facility balala asadanga liasü. Paisa, Cyber Forensic R&D Lab semdang, kong pai facility tem aser inyakyim benoka inyaka alibatem asadanga liasü.

Kasa mapang nung Angh-i, Kora aser Zodmo Technologies Private Limited ta startups ana

amenoktsüogo, aser iba ajanga Nagaland nung aliba lanurtem entrepreneurship, technology aser innovation nung renloka aoba sayur,

Zodmo Technologies ya state nung yangluba online shishilembadak ka lir, aser iba ajanga tamshirtem nem Nagaland yongtsü nung oset aser service balala alitsü, ayoktsü, apua amshitsü aser oset aser service balala bushitetsü asoshi maongka agütsür.

Angh Yadav-i, item entrepreneurs tem den sensaksemogo aser iba ajanga

ajak terenlok atema technology amshitsü aser kasa mapang nung state nung startups aser digital enterprises tem ecosystem ka nongita yaritsü asoshi lanur entrepreneurs aser innovators tem ajungmesotsü koda tongtumbang aji sayuogo.

Maneni Angh nem NIELIT Kohima nung inyakyim balala indang metetdakja liasü. Angh-i iba riju semdangba ajanga state nung digital skills, technology, innovation aser capacity building ajungkettsü atema iba riju-i shilem agiba indang angatetsü asoshi maongka agütsüogo.

Senior Citizens Association Nagaland-i asükhu lemsatep

Dimapur, Luroi/August 20 (TYO): Senior Citizens Association Nagaland (SCAN)-i sangdong ka ajanga yimjung yanglur Niketu Iralu asüba osang angazüka mang ayimba lemsatepogo.

Iralu ya Senior Citizens Association, Nagaland züngsem tajung ka liasü, aser pa mapa tajung asoshi pa nem 2019 küm October 1 nü International Day of Older Persons anogomung amungba mapang Senior Citizens Nagaland Award agüja liasü.

Niketu Iralu asüba ya Naga nunger atema dang masü saka pa shisatsü, ajemaluba aser yimjung atema bendanga agüja

inyakba senti süa agirtem ajak asoshi takoksa tulu lir. Pai, shisatsü ya kodang ochiba, ariabilemba aser ajemaluba den meyoktepdir, taneptsü aser longjemshitsü atema tashi tulu ka akümer ta sayuogo. Pa onok züngsem ka asüba atema kanga nema danga bilemer aser 2019 küm pa nem Senior Citizens Nagaland Award agütsüba ya maongka ka liasü, ta association-i ashi.

Sechü-Zubza nung par ki Kerünyü Ki (House of Listening) kong pa kinungtsü Christine den lia liasü, iba ki ya sensaksem, lepa reprangshitsü aser longjemshitsü atema wadang balala nungi nüburtem

adenshiba ki ka liasü.

Senior Citizens Association, Nagaland-i, Christine Iralu, par chirnur aser mang yima aliba Iralu'er kinunger ajak den asükhu lemsatep. Mangyim jashi mapang Tsüngremi parnok nem tashi, anisüngzüük aser yimjung agütsütsü sarasademja atar.

Nagaland nung aliba nüburtem den külemi Association-ia pa mapa tajung, shisatsü aser telongjem asoshi aser pai bendanga agüja inyakba atema aküm tetushi agütsür, pa mapa tajung ya putu aika asoshi tatishitsü tulu asütsü, ta kasa sangdong ajanga metetdaktsü.

SBI-i executive office chair tenla agütsü



Dimapur, Luroi/August 20 (TYO): Corporate Social Responsibility 2026-2027 kübok State Bank of India-i August 20 nü Municipal Affairs Department, Kohima nem executive office chair tem tenla agütsüogo.

Director, Municipal Affairs, Temjenrenla Kechu-i, department nem tenla tajung agütsüba atema SBI dang kanga

pelaba lemsatepogo. Parnokisa SBI-i, housing loan aser tanga scheme balala agütsüba indang sensak asem aser nüburtem ajangzükdaktsütsü atema longjemmer inyaksü mulungtepa liasü.

Kasa mapang nung Kichu-i, jila nung solar street lighting aser jana bendena entokba truck tem koda tongtumbang iba indang lemsatep, aser SBI dang

takoktsü dang süra tarurtsü nung CSR kübok item tenündakbatem agütsütsü mepeshia liasü.

Iba inyakyim ya DGM (B&O) SBI Jorhat, Narendra Pratap Singh, SBI ketdangsürtem aser Director, Temjenrenla Kechu aser Municipal Affairs nungi ketdangsürtemi achayanga liasü.

ECI secretary-i Kohima nung SIR inyakyim asadang

Dimapur, Luroi/August 20 (TYO): Photo Electoral Roll 2026 atema tang benoka inyaka aliba Special Intensive Revision (SIR) dak sendakba nung Election Commission of India, Secretary Binod Kumar-i, August 20 nü Kohima district nung SIR exercise indang lepareprangshia liasü.

Iba sentong nung Additional Chief Electoral Officer, Awa Lorin, aser Deputy Commissioner & District Election Officer, Kohima, B. Henok Buchem, NCS natia shilem agiogo.

Lepareprangshiba senden nung District Election Officer (DEO), Electoral Registration Officers (EROs), Assistant Electoral Registration Officers (AEROs), aser polling station tem nungi Booth Level Officers (BLOs) tema denogo.

Secretary Binod Kumar-i, ketdangsürtem dang iba inyakyim ya süoki ia agitsü aser takokba tashi tajungtiba inyaksü ajungshi, aser ashiba agi, SIR ya state aser linük atema putu aika asoshi tajangzüük asütsü.

Paisa, mapping ajema aliba polling station tem nung ketdangsürtemi tetsükdaktsü balala ajangshiba indang sensak asem aser parnok dang atakzüka aliba mapang shitak nung maparen tembanga inyaksü atema Enumeration Form tem alemba aser bendenba inyakyim jelia tembangtsü tetuyuba agüja liasü.

Maneni pai ERO aser AERO tem dang field tem semdangtsü aser SIR figure ajema aliba tesemtem nung BLO tem den ken o balala sensak asemstü ajungshia liasü.

Livingstone Foundation nung AI discipline seminar agi



Dimapur, Luroi/August 21 (TYO): Anogoshia kija taküm aser academic nung Artificial Intelligence ya kanga tongtumbang küma aoba mapang ka nung Instudia aser Livingstone Foundation College, Dimapur na longjemmer "Building Responsible AI Usage Habits and Digital Discipline" omen nung ajemdaker August 20 nü seminar ka ayongzüka agiogo.

Iba sentong nung educator aser kaketshirtemi shilem agia liasü.

Seminar nung shilem agirtem nem AI revolution anagateta len mesapokyonga aotsü asoshi tongtumbang shisatsütem agütsütsü nukjidong nung iba sentong ayongzüka agiogo. Technology dak tali memetaloktsü aser AI dak dang metaloker alitsü melena iba ya asen mapa tayongba kümdaktsütsü atema hadir ka amshitsü asoshi digital discipline nungdakba angatetdaktsütsü asoshi talisa iba seminar ayongzüka agiogo.

Technical aser sensaksem sentong ya shisalen sayur

Vishal Bardewa-i anir agi, shibai tajangzüük ka-a angazütsü asoshi AI ya koda amshitetsü iba indang lemsatep. Bardewa-i khuret angateta AI amshitsü atema practical frameworks tem sayua liasü. Paisa, asen sangsangji ya koda tongtumbang, techonology dak tali memetaloktsü atema arrtsü lateta ayuba, AI-i generate asüba osangtem jangjashitsü aser AI ya automated assignment generator ka ama masü saka tesayur ka ama amshitsü koda tongtumbang iba indanga lemsatepa liasü.

Paisa, AI yagi kodanga meimchir teshisadangba, shisatsü, aroka bilemba mesüra s a n g r a s a n g j i memelendaktsütsüla, saka item shisatsütem tajungba amshitsü atema hadir ka ama amshitsüla ta ashi.

Seminar ya Q&A session ka agiba sülen tembang, kong kaketshirtem aser faculty temi AI dak tali metalokba, data privacy aser technology agi atsür aoba lima ka nung academic integrity wakzüka ayutsü koda tongtumbang iba indang sensaksema liasü.



OFFICE OF THE CHANGTONGYA STUDENTS' UNION

Tenüngsang Agütsür



Wb. Limasunep Jamir IPS.



Sb. Imnatoshi.



Wb. Akumtemsu

Changtongya Kaketshir Telungjem mendenti nungi taküm 80 Buba Independence Day anogo nung Sensosanger shirnoksa senpet tulu nguteta yimer nem Khonang nüngsang aser tetushi agütsür.

1. Wb. Limasunep Jamir (IPS) : Presidents Police Medal nung Medal for Meritorious Service (MSM) senpet anguba.
2. Sb. Akumtemsu : Divine Connection Band nung züngsem ka shir telok Distinction in Arts, Music and Literature nung Governor's Award anguba.
3. Wb. Imnatoshi : Agricultural Technology Management Agency (ATMA) Mokokchung ajanga Agri & Allied Sector nung Certificate in Excellence anguba.

Tsüngremi nenok Wadang nung maneni moajangma.

Sd/-
AKUMDONG
President, CKT

Sd/-
TIAZUNGLA
General Secretary, CKT

GOVERNMENT OF NAGALAND

STATE COUNCIL OF EDUCATIONAL RESEARCH AND TRAINING

NAGALAND, KOHIMA.

NO.SCERT/TET/GEN.CORRES-3/2026/

Dated Kohima, the 20th Aug, 2026.

NOTIFICATION

It is hereby notified to all concerned N-TET applicants that the last date for submitting N-TET online application has been extended upto 11th Sep. 2026.

KERÜÜPFEÜ RÜPREO
Director
SCERT, Nagaland, Kohima

GOVERNMENT OF NAGALAND

DIRECTORATE OF HIGHER EDUCATION

NAGALAND: KOHIMA.

NO.HED/SCHO/NSNC/40/2025/87

Dated Kohima, the 20th August 2026

AZIM PREMJI SCHOLARSHIP 2026 (For Girl Students only)

The Azim Premji Foundation invites applications for the Azim Premji Scholarship 2026 to support girl students in higher education. The Scholarship provides financial support up to Rs. 1.5 lakhs (Rs. 30,000 annually) till completion of undergraduate programme (2-5 years).

Eligibility:

- * Passed Class 10 & 12 as a regular student from a government school/college in eligible States/UTs.
- * Admitted in first year (2026-27) of a recognized undergraduate degree/diploma course.

Further information and online application available at: <https://azimpremjifoundation.org>
Last date of online application (Round 1): **31st August 2026**

Note: Scanned documents for the upload should be clear, coloured, unedited/unfiltered copy of the originals.

Issued in public interest by : **Nagaland Scholarship Nodal Cell
Directorate of Higher Education,
Nagaland: Kohima**



August 20, 2026 nü Singapore nung India-Singapore Ministerial Roundtable (ISMR) senden nung Union Finance Minister Nirmala Sitharaman, External Affairs Minister S Jaishankar, Union Commerce & Industry Minister Piyush Goyal aser Minister of State for Electronics & IT and Commerce & Industry, Jitin Prasada nunger adenba noksa nung angur.

Police-i tashiyim amshiba bushisüngdangtsü atema luden ka tentet

New Delhi, Luroi/August 20 (Agencies): Tawa Delhi nung kaketshirtemi longkak aitba mapang nung police-i kaketshirtemi dak tashiyim amshiba aser kaketshirtemia police anema inyakba bushisüngdangtsü atema Supreme Court-i züngsem pongui akümba committee ka tentetogo, ta osang ka ajanga metetdaksü.

Iba committee nung tongtiji taoba mapang Supreme Court nung judge inyaksang Justice R Subhash Reddy lir.

Chief Justice Surya Kant den Justice Joymalya Bagchi aser Justice V Mohana nungeri akümba bench-i, committee nung tanünga züngsemtemji taoba mapang Punjab & Haryana High Court nung Chief Justice Ravi Shankar Jha, taoba mapang Delhi High Court Judge Justice Shalinder Kaur, taoba mapang CBI Director Rishi Kumar Shukla aser retired Meghalaya DGP, L R Bishnoi nunger lir, ta metetdaksü.

"HPEC (High-Powered Enquiry Committee)-i agütsüba report ji iba court atema kanga

teyari tulu asütsü, aser iba Committee yagi onük ajak jungjunga asadangtsü," ta bench-i metetdaksü.

Bench-i Committee dang iba ken o ya maneni bushisüngdangtsü aser tebushitetbatem osangji mapang shia court nem metetdakjang ta tuyuogo.

Supreme Court-i HPEC dang longkak aitba mapang ozüing alema inyakba mapatem, amokmerenba aser longkak aiter tetsürtem dak tim mesüi beshibatem bushisüngdangang ta tuyuogo.

"Iba denji külemi HPEC-isa longkak aitertem dak police aser sepaitemi tashiyim amshiba aser ozüing alema inyakba mapatem bushisüngdangtsü," ta bench-i metetdaksü.

July 20 nü Cockroach Janta Party (CJP) leniba nung kaketshirtemi longkak aita Parliament-i aoba mapang nung longkak aitertem aser sepaitem tsüngda raratepa liasü.

Longkak aitertem nokdangtsü atema sepaitemi ajok aser tear gas amshiba den külemi 'pellets' khaloktsü.



August 20, 2026 nü Chengalpattu district nung 31buba Southern Zonal Council (SZC) senden nung Union Home Minister Amit Shah aser Tamil Nadu Chief Minister, Joseph Vijay n tangokba noksa nung angur.

Tesüiba mapang arrtsülen aliba tesemtem sendoka liasü: Rijiju

New Delhi, August 20 (Agencies): Brihostibarnü Union Parliamentary Affairs Minister, Kiren Rijiju-i, tesüiba mapangtem nung arrtsülen aliba tesemtem sendoka liasü, ajisüaka tangbo item tesem ya Narendra Modi-i aniba sorkar atema tongtibang, ta metetdaksü.

2013 küm Parliament nung jembidang taoba mapang defence minister A K Antony-i, tamalen India sorkari arrtsülen aliba tesemtem nung terenlok mapa meinyak saka UPA sorkar maruba mapang nung sorkar balalai iba asalentong melenshia liasü, ta jembiba o Rijiju-i lephsia metetdaksü.

China nunger sepaitemi Arunachal Pradesh kübok Upper Subansiri region nung inyaksangshiba atema tebilemtsü akaba mapang ka nung Rijiju-i X ajanga, "Nisung kari arrtsü dak sendakba nung parnok tebilemba jembiogo. Arrtsülen terenlok mapa inyaksüji tasak, ajisüaka @narendramodi sorkari arrtsülen terenlok mapa inyaksü. Terenlok mapa kera

inyaksü atema ni Arunachal kübok Maza, Galemo aser Taksing areas semdangogo. Tesüiba mapangtem nungbo arrtsülen aliba tesemtem sendoka liasü saka tangbo arrtsülenji tongtibang kümdaktsüogo," ta metetdaksü.

Bodbarnü Rijiju-i, China nunger sepaitem Arunachal Pradesh telungi kilometer 60 tashi aitogo ta prokba osangji tai, ajisüaka arrtsülen aliba nüburtemi tebilemtsü akabajibo tim dang, ta metetdaksü.

"India-China arrtsü ken o ya kanga süoki ia agitsü onük ka lir. Iba ama onük ka nung tiyazü mejembitsüla. Onoki tesüiba mapatem nung aibelenba tanaben melephshiner. Nüburtem tebilemtsü onük atema sorkari inyaksü aser India nunger litsü kümzüka ayutsü," ta Rijiju-i X ajanga metetdaksü.

August 11, 2026 nü Ministry of External Affairs otongdar, Randhir Jaiswal-i, "India aser China na tsüngda arrtsü dak sendakba onüktem atema onoki China nungertem den jembir, aser item onük ya kanga tongtibang," ta metetdakja liasü.



TIR YIMYIM YIMOBILEM (EDITORIAL)

DIMAPUR FRIDAY, AUGUST (LUROI) 21, 2026

Nütsüng Züngdang

2011 küm tesüsa India nung nütsüng yongsük züngdanga liasü aser tesüiba küm 15 tashi nütsüng-yongsük mezüngdangi aruba sülen tang linük nung nütsüng züngdangba maparen tenzükogo. 1881 küm nungi tenzuka India nung küm ter shia nütsüng yongsük sükdanga aruogo, anungji shidakba agibo 2021 küm nütsüng züngdangtsüla liasü, ajisüaka coronavirus wara aliba agi nütsüng yongsük züngdangba maparen küm aika atsülanga aruogo. Ajioda 2021 küm census magiaka 2023 küm April ita nung India-i China nunger nütsüng ajateta alima nung nütsüng teimtiba aliba linükji India kümogo (UN-i asadanga). 2011 census nung India nunger nütsüng billion 1.21 liasü aser tangbo nütsüng billion 1.47 shi alitsü südi ta asadangteter. Linük nung terenlok mapatem inyaksü aser asalentong balala yanglutsü atema mapang shia nütsüng yongsük züngdanga jangjatsüji kanga tongtibang, ajisüaka wara aliba agi 2021 küm census magiteti aruba sülen küm aika lir tang ang nütsüng züngdang aser iba maparen ya sangküm küm tetenzüklen tashi nungbo tembangtsü sorkar sentong lir. Tesüiba mapangtem nungbo census agitsü atema ita 11 tashi agi liasü saka tangbo technology teyari ajanga mapang tatsüba agitsü imlar. India ama linük tuluka nung nütsüng yongsük züngdangtsü maparen ya atamata mapa ka masü. Ajisüaka census agiba ajangadang linük nung nütsüng kwi aliar jangjaba den külemi nütsüng-nüburtem rongsenketzüng jenjang, atsüapong (tetsür-tebur) kwi, kanga sensak tia nung alirtem kwi, middle-class pur kwi, takar kwi, matamabensartem kwi, kibong kümer alir kwi; item ama osangji tejangja metettsü. Item osangji jangjaba ajanga dang sorkari nüburtem taküm libaliro jenjang ajungkettsütsü atema asalentong junga yanglutettsü. Census agia nütsüng jangjaba ajanga nüburtem jenjang junga angatetter, ibayongji sorkari census nung sen crore aika indok mesasar. Ajisüaka küm pongu tashi census atsülangba ajanga nütsüng nübur aika takoksa ngur asütsü. Tatishitsü agi, tesüiba küm pongu tashi tanur asoba aser nisung asüba report mali, aser ibaji ajanga healthcare asalentong junga meyanglutet südi, scheduled castes aser scheduled tribes nübur aikati reservations maongka magitet mesüra sensaker aikati Food Security Act kübok teyari magiteti aruogo. National Food Security Act, 2013 ya India nunger nütsüng shilem 67 nem jenjang dalang agi jang agütsütsü atema lir, ajisüaka 2011 küm census agiba sülenbo küm aika census magiba agi India nunger million 100 dak temai Food Security Act kübok teyari magiteter. Census data nung ajemdaker sorkari welfare programs yanglur, food security schemes yanglua benoker, yimtsüngtem atema asalentong balala yanglur aser state tem nem senotsü shidak lezmüksür. India nung dang masü saka bendanglen research agirtemia India nunger rongsenkettzüng aser loktiliba jenjang asadangtsü atema nütsüng yongsük osang tejangja nungdaker. Rongsenketzüng tsütsü mongintem, loktiliba tsütsü mongintem aser shisashirtemi linük atema asalentong tajung benoktsü asoshi census data nungdaker, saka 2011 küm census agiba sülen tesüiba küm 15 tashi census magitetba ajanga lenla aika nung takoksa ngua arudar. Ajioda tang census maparen ya tembangba sülenbo census nung ajemdaker sorkari mapatong tajungba benokba ajanga nüburtem kanga tajangzük angutsü imlar.

OLEMSABANG

KÜ MEIMLALUYANG

~ Thriocy Stm, Mokokchung

Temeim nüktzü tsünger pila,
saka teti asoshi masü,
tsüngküm ka apir ajuruteptsü
temulungjang nung yur menungra
terongjen mulungjang bener kü meimla den pila.

Tsüngremi kü meimla nem
sempet tajung ka agütsür liasü,
kü meimla nem ola tatsüng aser
tsüngküm ka metetdaksütsü
la nem tashi agütsür liasü.

Shirang yipden nung liaka
kodang la ola angashir memeteti
nüktzü tsünger menungra la olaji angar.
Terongjen mulungjang bener liaka,
kü meimla ola angashidang
tepela aser tesünep ka angu.

Kodang lai la ola tatsüng jagi kenden tenzükdir
nüburtem mulungjang nung
Oh! tsüngküm abenla aruogo nih!
ta lai kechi sangoktsür ibaji angateta
nüburtemi pei pei wadangji tenzük.

Ni dang masü saka nübur aikadi
la shilangtsü koda yongyar,
arem min nung jaja liakasa
la ola tatsüng aser tajung jagi
meta ajak koda lemladaksür,
idangji ni kü mulungjang nung
tepela aser tesünep kati semdang.

Taküm sangno tilaka süaka
Tsüngremi nükjidong ka yur yanglu ta
kü meimla taküm ajanga aseni
Tsüngrem ketmongji tali angateter.
Kü meimla tenüngji aikadi tsüngkümla
aser tsüngküm abenla ta ajar,
saka kü meimla tenüng ya Luyang lir,
Oh! Kü meimla Luyang, yakta shilangang nih!

Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir

Nicaragua nung Spanish Laishiba küm 457 ajungbamong amonger



Spanish Laishiba, Bear Bible (Biblia del Oso) küm 457 ajungbamong sentong nung telok kati shilem agidang tangokba noksa nung angur.

August 20, 2026: Nicaragua nung Arogotemi Spanish Laishiba, Bear Bible (Biblia del Oso) küm 457 ajungbamong amonger, ta osang ka ajanga metetdaksü.

Bear Bible ya Spanish oshi nung mezüing renemba Laishiba lir.

Managua nung aliba Plaza de la Biblia nung tetenzük sentong nungji evangelical denomination balala nungi Khristanem aika aden.

Iba sentong ya Federation of Nicaraguan Evangelical Churches (Federación de Iglesias Evangélicas Nicaragüenses, FIENIC)-i ayongzüka liasü.

FIENIC-i sangdong ka ajanga, "Taküm nung temelenshi adokdaksüba O nung ajemdaker iba ya telongjem benjungmong ka lir. Onoki iba mapang ya Nicaragua nunger kibong ajaki meyipa reprangshiba mapang ka südaktsüner," ta metetdaksü.

Iba benjungmong dak sendakba nung Lai bushitsü, sarasadem sentongtem agitsü, meyipa reprangshiba sentongtem agitsü aser Spanish Laishiba puti otsü dak sendakba nung sobaliba sentongtem ayongzüka agitsü.

Yimsü temeden kanga mejungi aliba linük ka nung iba sentong ya agir.

United States Commission on International Religious Freedom (USCIRF)-i ashiba agi, Nicaragua nung yimsü dak sendakba organization aika anentsür, yimsü lenirtem amokmerener aser yimjak nung tekülem sentong agiba nokdanger.

Christian Solidarity Worldwide (CSW)-ia Nicaragua nung ketdangsertem yimsü, shisaliok, organisations aser melungtet telok balala anema inyakba metetdaksü.

Open Doors-i Nicaragua ya World Watch List nung züngoka lir. Iba linük nung Arogotem aser Khristan lenirtem anema inyaker, ta Open Doors-i metetdaksü.

Akhidang nungi Bible Day anogomong nung Evangelical Khristanemi yimdong süa jajar aser moapu nung lokti sentongtem ayongzüka agir, ajisüaka tangbo item ama sentong nokdanger.

Bear Bible ya 1569 küm Basel nung sayaa liasü. Iba Laishiba ya Casiodoro de Reina-i meyipzük. Pa ya Hieronymite putir ka liasü aser tesülen pai Protestant Reformation nunga inyaka liasü.

Bear Bible ya Spanish oshi jembirtem atema lir aser Spanish oshi nung Laishiba rangben (Tasen Lai & Tejen Lai) mezüngbubaji iba Laishiba ya lir.

Küm aika sülen Cipriano de Valera-i iba Laishiba tasen adokshia liasü (Reina-Valera version), aser tangbo iba Laishiba ya Spanish oshi jembiba evangelical Arogotem teimbakati amshir.

Mangu County nung Fulani kiralongrar teloki Khristan 24 tepset

August 20, 2026: Nigeria nung Plateau state kübok Mangu county nung aliba Bin Mper yim amakba mapang nung Fulani Muslim nunger telok kati Khristan 24 tepsetba sülen Mongolbarnü kinüngertemi asüpila sentong agia tasü mang remtsüogo.

August 18 anepdang Fulani teloki Khristan yimsüing amakbaji Plateau State sorkari sashia aitsüba den külemi security agencies dang iba tatalokba bushisüngdangang, ta tuyuogo.

Plateau State Commissioner for Information & Communication Rt. Hon. Joyce Lohya Ramnap-i sangdong ka ajanga, sorkari iba tatalokba aitsür aser takoksa angurtem den mangyim tejashi lemsateper, ta metetdaksü.

Governor Mutfwang-i security agencies dang Bin Mper, Kombun District nung maneni mita aotsü tetuyuba agütsüogo.

Sorkarisa yimdaklirtem dang aibelenertem maitsü jangjatsü atema security sepaitem den yaritepang, ta metetdaksü.

Yimdaklirtemi, iba tatalokba nung Khristan 24 asü aser yirua alir nisung asem hospital nung mongdar, ta metetdaksü.

Mwaghavul Youth National Association Tir, Jonathan Kyesmang-i, tawa iba tesem nung tensa kanga mejungi kümogo, ta metetdaksü.

Asüpila sentong nung jembidang pai, "Onok ya yimjung meimba nisungtem. Onoki Mangu Local Government, Plateau state,

Nigeria aser Africa tesem balala nung tanga yimsü amanger ajak den yimjung nung liteter," ta metetdaksü.

Kyesmang-isa, yim amakertemji ajakbo Fulani Muslim nungertem masü, kechiyong Fulani nungersa süaka parnok aikati ajak den yimjung nung liteter, ta ashi.

Asüpila sentong agia tasü mang remtsüba sülen Kyesmang-i Khristanem dang maneni longjema alitsü ayongzüka den külemi ketdangsertem dang yimjung meimba Khristanem kümzüksü atema inyakang, ta mepishi.

Mapang shia central Nigeria nung telok balalai Khristan yimtsüngtem, Tenla kitem aser aluyimer Khristanem amaker.

ANOGO ABEN TSÜNGREM DEN

Ainba aser terenlok

Shibai nenok dak mapa tajung tenzük, pai Yisu Khrista anogo tashi ajisa abensatsütsü ta ni amanger. - Filipi 1: 6.

Tanelaren ainbaji bendanga agütsüba Khristan tem nükrangji lir. Tejakleni aoba putu ka nung asenok alir. Rongsen, tekolok shisatsü, aser putipuyang metetba kanga renloker. Kechiba nisung ka asoshi tongtibangtiba tanelaren nung merenloktsü?

Bendanga agütsüba Khristanemi ama asenoki Tsüngrem o metetba nung aintsü bushir. Tsüngrem uluba tesüngmangtsü indang metetner. Tsüngremer sentsüwangshi tajungtemji kechisa? Asenoki teti bilembatemji kechisa?

Asenoki tamang nung inner. Kong tashi mait aser inzüba tamang lir, terata aser mamangba tanela yimra agi tongdaksür. Mulung lemtet tamang agi Khristai asenok asoshi inyakba den pelateper. Iba yagi Tsüngremer tenangzükbatem jenjang nung teka songtema ia amdaker. Iba yagi tasü tait Khristan taküm ka alitsü ajungmesor.

Khristan taküm ka tamang nung aintsü asoshi iba yagi mapa tajung inyaktsü sadema lapoktsür. Iba yagi külemtsü asoshi tenlatsü ajungshir. Laishiba, külemtsü aser azüngtsu asoshi anasai bener arutsür. Sarasademtsü ne mulungjang anasai bener aru.

Hungary nung temeshi ainlen jajar Khristan 12 asü



August 20, 2026: Northern Hungary nung Poland nunger temeshi ainlen jajar Khristanem aika bus tsükokba lendong nung asü.

Bus nungji passenger 57 den driver ana liasü. Amongnü nikongdang 1:00 ako meta Mezokeresztes nungi bus ji apusoa liasü, iba sülen mapang tatsüka tsüngda tsükok.

Poland nunger Khristanemji Bosnia & Herzegovina nung Medugorje indang Catholic shrine semdangba sülen par linüki meyipa aoba mapang iba lendong atalok.

Iba lendong nung driver bo kümzüka tang police ket nung lir.

Poland foreign ministry-i, passenger temji teimbaka Eger, Debrecen aser Miskolc nung aliba hospital temi anir ao, ta metetdaksü.

Iba lendong nung nisung ter kanga mejungi yiru aser nisung 37 tera yirua liasü.

Osangbener den jembidang bus company kiburi, bus anir anaji driver kanga tajung, saka iba lendong komaser atalokar mejangjar, ta metetdaksü.

Poland Tir Karol Nawrocki-i, "Hungary nung Poland nunger bus ka tsükoka ozü senso aika asüba osang angashia jashir," ta metetdaksü.

Paisa, "Iba tatalokba ajanga ajak melung raksar. Takoksa anguba kibongtem atema sarasademtsür," ta metetdaksü.

Hungary Ato kilonser Péter Magyar-ia mangyim jashi lemsatepba den külemi kümzüka maparen nung shilem agirtem dang pelaba metetdaksü.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Züngyazüngko

(v) metsüjang azüngba (seeds planting)

* Züngyazüngko mapa ya kanga ashibanga inyaksüla.

Züngyazüngko

(adj) azüngashia o züngtepba (swear)

* Tapi agibo züngyazüngko masütsüla.

OLONG PAITEP # 76025

1		2		3		4	5			
				6						7
		8								
9				10		11				
			12						13	
						14				
16						17				

TIPIEN

1. Nisung jenti
4. Tsük rudenba
6. Temzüng tesashi
8. S___i
9. Nisung rongnung telemasa
10. Anogoshi
12. Ajanga aor
13. Tsük rizüngdak
14. Tebang nungi adokba
16. Süngdong tatembangtiba
17. Meputep

- (5)

- (5)

- (5)

- (3)

- (3)

- (4)

- (4)

- (3)

- (3)

- (5)

- (5)

LANGTSÜNGLEN

1. Tenük telong
2. Committee dang ajar
3. Yagi ki okdoker
5. Yim lenmang
7. Temoatsü keter meyipa aruba
11. Kanga junga menemba
12. Kenyongi majinü
13. Rong kanga tulu

- (9)

- (5)

- (7)

- (5)

- (9)

- (7)

- (5)

- (5)

OLONG PAITEP # 7604 TELANGZÜBA**TIPIEN :**

1. Semtu, 3. Lepko, 5. Bilem,
8. Ulu, 10. Tsünpang,
11. Tesangwa, 13. Aoksa, 15. Putir,
16. Yipru.

LANGTSÜNGLEN :

1. Sayu, 2. Teb, 4. Kimong,
6. Lungkak, 7. Milak, 9. Zünga,
10. Temopu, 12. Walu, 14. Ali.

Assam: Congress-i lenir 14 party nungi mintok

Guwahati, Luroi/August 20 (Agencies): 2026 Assam Assembly election nung party anema inyaksangshiba atema Assam Pradesh Congress Committee (APCC)-i party lenir aser party kübok inyaker parnok 14 küm trok atema party nungi mintokogo.

APCC tir Gaurav Gogoi-i tetuyuba agütsüba sülen APCC General Secretary (Organisation) Ramanna Baruah-i iba osang ya sangdonga liasü.

Lenirtem ya Silchar District Congress Committee (DCC), Assam Youth Congress aser Sonai constituency party organisation tem nungi lir.

Party nungi mintokba lenirtem rongnung Silchar DCC vice-presidents Samsur Rahman Choudhury (John), Aktar Hussain Barbhuiya aser Mojibur Rahman Choudhury, Silchar DCC general secretary (Organisation) Ajmol Hussain Laskar aser general secretary Shaine Ahmed Laskar aser Mehboob Hussain (Ripon) nunger densema lir.

Tetuyuba nung shisema alirtem rongnung Assam Youth Congress Committee general secretary Ijjaj Laskar-a densema lir.

Maneni party kübok inyaker, Silchar DCC general secretaries Hanif Alam Mazumder, Altaf Hussain Laskar (Titu) aser Najib Ahmed Laskar; Minority Department general secretary Jahur Choudhury; BCC Sonai general secretary Kadir Ahmed Laskar; taoba District Minority Department tir Ansar Hussain Barlaskar; aser Sonai Youth Congress tir Rakib Ahmed Mazumder nungera mintokogo.

Item nisung 14 ya Assembly election mapa party anema inyakba ngutetogo, ta tetuyuba nung shia lir. Tetuyuba agütsüba anogo nungi tenzüka küm trok atema parnok suspend sütsüogo.

Iba tetuyuba indang copy ya AICC General Secretary (Organisation) KC Venugopal aser Assam in-charge Jitendra Singh na densema Congress lenirtem tejentem dangi yokogo. APCC tir Gaurav Gogoi aser Assam Congress Legislature Party lenir na nema copy kaka agütsüogo.

Maneni tetuyuba ya APCC ketdangpurtem, party media aser social media departments, Silchar DCC, APCC war room aser ken o dak sendaka alir ajak nem agütsüogo.

KSU rally mapang Assam nunger kibong ka amak; tanur yiru**Guwahati, Luroi/August 20**

(Agencies): Bodhbarnü Meghlaya yimtiba nung Khasi Students' Union (KSU)-i rally ka ayongzüka aliba mapang Assam nungi kibong ka Shillong-i oya alidang amak. Parnok mena aliba gari ya kanga mejungi raksatsüogo aser gari telung nung mena aliba tanur ka aina tejaksa agi yirua liasü.

Online nung prokshia aoba video ka ajanga gari kanga mejungi raksar aliba sayuogo. Tanur tebui ashiba agi, par kibong ya Shillong-i oya aliba mapang kecha tekümdangtsü memetdaksüi parnok mena aliba gari amak tenzü.

"Ajungbena dang parnoki onok mena aliba gari amak. Ozü tanur gari telung nung liasü aser yiruogo. Aina tejaksa agi pa yirua liasü," ta tebui video nung

shia lir.

Shillong nung KSU rally mapang iba lendong ya atalokogo. Tensa tamajungba küma aoba sülen nisung aika tazü chiogo aser gari aika raksaogo.

Osang ajanga ashiba agi, tejak nembanger aliba nisungtemi rally aoba lenmang nung senzuba nija aser sorkar gairtem aser Assam registration plates enoka aliba garitem makogo. Nisung karibo pro-KSU yimyimtem ayimba angashio. Item nisungtem maitsü aser parnok koba lokti tentet den sendaka ali iba indang osang tejangja memetet.

Mepetmesü adokba mapang nisung aika yiruogo, aser gari kar rongtoktsüogo aser iba ajanga iba tesem nung alirtem aser gari anishirtem tetsüba agi

süngdakja liasü.

Assam registered garitem amaker ta angashiba sülen alima penzütem, transport nung inyakerter aser tanga senzusenpongertem shirnok Assam aser Meghalaya na sendaktepa lenmang teti amshir item nisungtem shisabulu tenzüko.

Motor vehicle workers' union temi item tatalokbatem aitsüogo, aser iba amala tatalokba ajanga Assam-Meghalaya lenmang nung transport service tem minprongtsü akok ta tekümdangtsü metetdaksüogo.

Mepetmesü adokba indang video aika online nung adokogo, saka item nisungtem yagi kechiba garitem ya amak, mesüra parnok maitsü tang bushisüngdang südar.

Meghalaya: KSU tir aser tangar ana judicial custody nung ayutsü

Shillong, Luroi/August 20 (Agencies): Shillong nung black-flag bike rally mapang apuba Khasi Students' Union (KSU) lenir asem anogo 14 judicial custody nung ayutsü atema District and Sessions Judge, Shillong-i Brehostibarnü tetuyuba agütsüogo.

KSU tir Raymond Kharjana, tatong tir Pynkmenlang Sanmiet aser general secretary Reuben Najar nunger Bodhbar aonung apu aser Sadar police station-i anirogo. Parnok Brehostibar anepdang okadaki anir oa liasü.

Rally mapang Shillong kübok tesem balala nung long agi ontepba den gari aser osettsüt balala raksatsüba aser telok balala tsüngda mangatettep adokba sülen lenirtem ya puogo. Police-i ashiba agi, gari 13 raksaogo aser nisung aika

yiruogo. Tanga state nung züngoksema aliba garitema raksatsüogo aser sorkar gari ka rongtokja liasü.

Police source balalai ashiba agi, lenir asem ya Bharatiya Nyaya Sanhita, 2023 kübok provisions balala dak ajemdaker puogo, kong public property raksatsüba, tangar dak azükba aser tanga aibelenitem densema lir.

August 4 nü Chief Minister Conrad K Sangma nem takhangba onük pongu agütsüba Meghalaya sorkari mataloktsüba anema KSU-i iba rally ayongzüka liasü. Iba kaketshir lokti tentet yagi anogo 15 atakzüka liasü.

Takhangba nung Meghalaya Residents Safety and Security Act (MRSSA), tangalen nungi mapa inyaki arurtem atema ozüng yanglutsü, sorkar

recruitment inyakyim nung temelenshi aser North Eastern Indira Gandhi Regional Institute of Health and Medical Sciences (NEIGRIHMS) nung recruitment dak sendakba nung ken o tem atema jenjang agitsü akhangba densema lir.

Union-isa, East Jaiñtia Hills nung Shree Cement project atema July 13 nü public hearing agiba ya thitsütsü khangogo. Parnokisa Meghalaya nung Inner Line Permit (ILP) system benoktsü takhangba agütsüogo.

Rally mapang yimti kübok tesem balala nung mepetmesü adoka liasü. KSU lenirtemi mepetmesü adokba atema sasa bilemba lemsatepogo aser mejangjaba nisungtem rally nung shilem agia kiojen aser osettsüt balala raksaja liasü ta ashi.



GOVERNMENT OF NAGALAND
DIRECTORATE OF TECHNICAL EDUCATION

Nagaland : Kohima - 797 004



Dt. Kohima, the thAug, 2026

NOTIFICATION

NO. DTE/ESTT-2/NEET/01/2024-25: As decided in the State Common Selection Board meeting held on 18th August 2026, the State Counselling for selection of candidates to fill the Nagaland State reserved seats in NEET-UG and NON-NEET UG Courses for the academic session 2026-2027 is scheduled on 25th August 2026 (Tuesday) in the Conference Hall of the Directorate of Technical Education, Nagaland, Kohima.

Counselling Schedule:

NEET(UG) : 10:00 am onwards

NON-NEET(UG) : 2:00 pm onwards

Candidates are requested to take serious note of the following:

- * Selection will be based purely on the NEET (UG) & NON-NEET (UG) - 2026 Merit and preference.
- * Candidates are informed to attend the counselling without fail. Failing which his/her candidature shall be forfeited.
- * Candidates are informed to bring 10 (ten) nos. of passports along with original documents during the counselling without fail.
- * The Merit List & Rejected List for NEET-(UG) & NON-NEET (UG) have been updated on the Department's website.
- * For details on seat/course availability, please visit the Department's website. <https://dte.nagaland.gov.in>

(ER. VIPULHOU LHOUNGU)
 Director.

North Korea-i ballistic missiles 10 dak tema khadok

Seoul, Luroi/August 20 (Agencies): Brehostibarnü North Korea-i short-range ballistic missiles 10b dak tema khadokba asoshi South Korea tir indang office nungi aitsü aser mitkartem dang tang United States den joint exercises aliba mapang ajak renema alitsü totuyuba agütsü.

North Korea-i Pyongyang area nungi Korean Peninsula anüdok tsütsü tzüyim leni missiles ya khaloktsüba sülen South Korea tir office ajanga ajungben security meeting ka jatep, kong defence ministry nungi ketdangsürtem aser mitkar lenirtem dena liasü, ta sangdong ka nung ashi.

"Ballistic missile khadokba ya UN Security Council pangzüng nung aibelenba mapa tamajung lir," ta sangdong nung ashi aser North Korea dang iba ama inyakyim tekeraba nung anentsü ayongzük.

Ketdangsür temi South Korea indang 'response posture' reprangshim, missile khaloktsüba auanga security nung tetsükdaktsü agütsüba asadang aser nüngdakba

meratem indang jembi, ta office-i ashi.

Missile ya tzüyim tsütsü anünglen kilometers 300 shi yima ao, ta South Korea indang Joint Chiefs of Staff ajanga ashi.

Japan sorkar aser coastguard temia North Korea-i tzüyim tsütsü ballistic missile ka khaloktsü ama ajiteter ta ashi. Iba 'projectile' ya tsükogo, ta Japan indang coast guard-i ashi.

Missile ya Japan indang exclusive economic zone tezülen tzüyim nung tsük ama ajiteter, ta NHK ajanga ashi.

US Tir Donald Trump-i iba military drills nung US shilem agiba kanga ajemtsü shia pai North Korea lenir Kim Jong Un den tesendaktep yanglushiner ta ashiba sülen South Korea aser US joint military drills ya tatsüba kuma Hokulbarnü tembangtsü lia North Korea nungi missiles ya khadokba alitsü.

United States-i North Korea tsütsü "hostile policy" ano memelenshi, ta Kim Jong Un teyi Kim Yo Jong-i Bodhbarnü shia liasü.

Missile khadokba ya anogo

ka tejakdang Kim Yo Jong-i jembiba o tem tu tema-tazütsü ka masü ta sayuner ama ajiteter, ta Seoul nung aliba University of North Korean Studies nung professor Yang Moo-jin-i ashi.

Missile khadokba nungya nükjidong ka kisüng masü, South Korea-US military exercise anema nokdakba, tawa North Korea indang nuclear arsenal indang jembiba aser Pyongyang security indang kangabo meshisadangtsü tekumdangtsü agütsür ama ajiteter, ta pai ashi.

"Iba yagi North Korea indang security ya North Korea-i lemtettsü ta ashirba lir, aser missile systems tajungba kuma yanglushir tendanger asütsü akok," ta Yang-i ashi.

Tan hopta Seoul semdang sang Chinese Foreign Minister Wang Yi-i South Korea dang Beijing aser Washington tsüngta indang indanga nokdaktsü ajungshi aser Korean Peninsula nung tensa tajungba kumdaktsütsü atema US-i North Korea tsütsü "hostile policy" amshiba yutsütsüla, ta shia liasü.

Iran yariba linük indang rongsenketzüng nung timtem alitsü: Trump

Washington, Luroi/August 20 (Agencies): Ita trok jungnüa jakdang Israel den külemi tenzükbä rara tatem kati arutsü asoshi United States-i kanga merangba mapang, Iran nem teyari agütsüba linük indang rongsenketzüng nung timtem agütsütsü, ta US Tir Donald Trump-i ashi.

Iba rara nung nisung meyrirjang aika tepsetogo aser kanga keraa Gulf linüktem atsüok aser alima nung shishilempaba nung kongshi, kechiaser Iran-i par tashi amshia Strait of Hormuz nung rong senzüba nokdang, koba ajanga taküm February ita matongdang anogoshi alima nung totzü amshiba shilem 20 shi bena liasü.

Rara tembangtsü lenmang nung jajar ama Hormuz ajanga rong tem akhi ama senzüdaktsütsü nükjidong nung US aser Iran nati April ita khen aser June ita khen ceasefire sangdonga liasü, saka ceasefire anaprong kanga kera raksa aser iba rara nung Israel shilem mali ama kumogo.

Bodhbarnü social media nung Trump-i kodanga majangshidangba "Economic Warfare and Isolation" ajurutsü nangzüka liasü.

1979 Islamic Revolution sülen küm 50 jungnüa rongsenketzüng nung tenokdangba balala agütsüba Iran-i kokteta arua lir.

"Shir linüki pei financial institutions, businesses, airports, mesüra sorkar entities tem ajanga Iran nem teyari a g ü t s ü d a k t s ü d i r , rongsenketzüng nung timtem

tulu ajurutsü," ta Trump-i zülü.

Trump-i ashiba ya America nunger par linük nung senotsü tebulemtsü ajangshia aliba nungi mulungsenttsü anizüker aotsü meranga inyakba lir, ta Iran Foreign Minister Abbas Araqchi-i ashi.

"America indang economic terrorism ajanga alima rongsenketzüng nung tebilemtsü agütsür aser alima tesem ajunga nung aliba linüktem national sovereignty nunga tetsükdaktsü agütsür," ta pai X nung ashi.

Iba rara tenzükdang Trump-i - Iran indang nuclear sentong azüoktsü, region nung par tsükchir dak amakba tashi soita ayutsü aser putir yimsüsüba atsüngdoktsü asoshi Iran nunger nem tensa ka yanglutsütsü - nükjidong ayuba tang tashi mataloki lir.

Trump-i social media nung amokmerenba aser sangdong agütsüba ya züluba ama mapang ajak nung mapa kuma meinyaker. US-i kechi komala mera ka agitsüar mashi mesüra linük kata tenünga pai mashi, saka tetsüngtai ia yimjung ken o jembiba nung yaritepba US tembar linüktem dang ashir ama angateter.

US mitkar jenti anenoka aliba linük, United Arab Emirates-i tarutsü nung sangdong ka magütsü tashi Iran den shishilempaba, commercial exchanges aser senotsü transactions ajunga anena atar, ta Mongulbarnü ashi.

Iran nungi khaloktsüba missiles ana tzüyim nung tsükba putet ta UAE defence ministry ajanga ashiba sülen iba mera ya agir, ajisüaka Iran-i aji tiazü ta

ashir.

Iran-i ayokba totzü shilem 80 dak tema China-i alir ta analytics firm Kpler ajanga 2025 data nungi sayur, saka US-i China den rongsenketzüng tsütsü meraraner, kechiaser US-i tongtipang rare earth minerals amala osettem China nungi abener.

"Sanctions aser nungshiba ajanga tebilemtsü mokoktettsü. China-i party ajak dang yimtenren aser jembishinü ajanga ken o angatetteptsü asoshi mera agitsü ayongzüker," ta Chinese Foreign Ministry spokesperson Lin Jian-i osangbener senden ka nung ashi.

Iran ya US den jembishinütsü mulunga lir, saka jembishibüba aser bendanga agütsüba memeyokteptsüla, ta Iran supreme leader indang adviser Mohammad Mokhber-i Mongulbarnü shia liasü.

'Military pressure' aser 'sanctions' agi Iran temulungtetba meraksatsü, ta Mokhber-i ashi.

Mongulbarnü Trump-i Iran den jembishinü masür ta shia liasü. Anogo ka tejakdang par apang aser special envoy Jared Kushner-ibo tang tashi jembishinü sütar aser tangsa tajungba ta shia liasü.

Trump yagi Iran indang 'highly enriched uranium' aginer aser par nuclear energy aser research programmes azüoktsü asoshi tezüngzüktep tesashiba aginer. Non-Proliferation Treaty nung meyongnem agüja alir ka ama Iran-i par nuclear sentong ya yimjung asoshi lir ta shia arur.



Office of the

MOLUNGKIMONG SENSO MUNGDANG

P.O. TULI, POLICE STATION TULI-798618

Dist. Mokokchung: Nagaland

TEPELA

LEMSATEPER

Shri TAKOSANGBA, S/o N. Temjen Tzudir, pai par Department (Veterinary Hospital, Dimapur) nung mapa meranga aser nendaka inyakba ajiteta 15th August 2026 nü Independence Day mapang District Commendation Certificate (award) agütsüba asoshi Government of Nagaland aser Veterinary Department dang pelaba lemsateper.

Sensosanger nem tenüng tajung bener arutsüba atema kanga pelar aser tarutsü nung nü mapa ajak nung azükarujang ta Molungkimong sensosanger ajak sarasadem.

Sd/-

Imolangba Longchar

Secretary

Sd/-

Purtoshi

President

Office of the

LONGMISA SENSO MUNGDANG

P.O Mokokchung - 798601 B.P.O Longmisa

Mokokchung : Nagaland

TENÜNGSANG

AGÜTSÜR

Longmisa Senso Mungdang ajanga tenüngsanga konang tajung senso nem bener arutsü nung tetushi agütsür :

1. **Kr. Tarenkala Y Lemtor** (D/o. Wb. Yashitemjen Lemtor & Wt. Nungshisula Jamir Gold Medalist B.A Geography 2026 Nagaland University.

2. **Wt. Sashimenla**, UDA W/o. Wb. Watisosang Office of the Deputy Commissioner & District Election Officer DISTRICT COMMENDATION AWARD on 80th Independence Day 2026.

Teyanglur Tsüngremi tarutsü anogotem nunga temoatsü nung len ania moajangma.

Sd/-

Pangersosang

President, LSM

Sd/-

I.Senkanungba Ao

G.Secretary, LSM

Bangladesh tir inyaktsü Mirza Fakhrul shimogo

Dhaka, Luroi/August 20 (Agencies): Bangladesh nung tang sorkar kumteta aliba Bangladesh Nationalist Party (BNP) indang candidate Mirza Fakhrul Islam Alamgir ya Bangladesh indang tir tasenba ama shimteta küm 35 nung tang mezüngbuba tir election tokteper takok angur alitsü.

Arishi küm 78 tain BNP lenir Mirza yagi Liberal Democratic Party mendenpuba aser Jamaat-e-Islami ajanga aniba opposition party 11 indang candidate Colonel (retd) Oli Ahmed madak takok angu.

Alamgir-i votes 255 angu aser Oli Ahmed-i votes 88 angu, ta Chief Election Commissioner and Returning Officer AMM Nasir Uddin-i ashi.

Vote agütsütsü temsüa alir nisung 349 rongnungi ozüng yanglur 343-i vote agütsü aser

par trok-i vote magütsü.

Alamgir ya Bangladesh indang tir tasenba ama Hokulbar nikongdang Darbar Hall of Bangabhaban nung tenangzükbä agitsü.

Iba election yagi küm aika Bangladesh nung tir election yimya kasa amshia aruba nungi pilar alitsü, kong iba menden ya tangatettep nung mesüra metoktepi shima aru.

Ato kilonser menden nungi atsüngdoka alila Sheikh Hasina den tesendaktep tajung alisang Mohammed Shahabuddin temang majungba mechi küm pongu kümsük mabensai taoba ita mapa nungi anenba sülen tir election ya agitsüsa akum.

Bangladesh nung 1991 küm tir election nung candidate balala tsüngta toktepba sülen tang mezüngbuba candidate ana toktepba nung Alamgir-i takok angur alitsü.

India Taekwondo National C'ship nung Nagaland team-i medal 2 angu



Dimapur, Luroi/August 20 (TYO): 5buba India Taekwondo National Championship 2026 nung Nagaland Taekwondo Association (NTA)-i medal ana nguogo. Iba asayamung ya Pune, Maharashtra nung August 16 nü tenzük aser August 21 nü tembangtsü.

Cadet Boys category nung Nagaland tenüng nung asayar pezüi shilem agiogo. Cadet Boys Under 33 kg category nung Sudeh Lamliu-i silver medal angu, aser Cadet Boys Under 45 kg category nung Rishi Doimary-i bronze medal ngua liasü.

Sudeh Lamliu-i asayamung tepeyong kanga junga asayaogo. Mezüngbuba round atema bye anguba sülen pai Gujarat, Uttar Pradesh aser Telangana nungi asayatem koka final atong, saka final nung pai Mizoram nungi asayar tera agi mekoki Silver medal dang nguteta liasü.

Under 45 kg category nung Rishi Doimary-ia kanga junga asayaogo. Pa-a mezüngbuba round atema bye angu aser pai Puducherry aser Rajasthan nungi asaya akok. Ajisüaka semifinal nung pai Dadra and Nagar Haveli nungi asayar makokba yong Bronze medal dang nguogo.

Asayamung nung kanga junga asaya-a state nem konang tetushi bener arutsü atema Nagaland Taekwondo Association-i asayar anaprongla nem tenüngsang agütsüogo. Association-isa, Nagaland nungi Cadet tebur asayar pezü prongla nem, parnoki bendanga agüja asayar kati beshitsüba yimya shitak beshia tasüita asayaba atema tenüngsang agütsüogo.

Maneni Association-i, state nung Taekwondo asaya ajungkettsü aser terenlok atema nongita yariba atema Director, Department of Youth Resources & Sports,

Government of Nagaland Kethosituo Sekhose aser Department kübok officer aser staff ajak dang kanga pelaba lemsatepa liasü.

Ano Nagaland Police Taekwondo Team Coach Seyievili Angami, Team Coach ama asayatem meiner aotsü atema temelaba agütsüba atema Nagaland Police Department dang kanga pelaba metetdaksü. Grand Master Lee Jeong Hee, Korea Dispatch Coach to India aser Senior Director of India Taekwondo danga kanga pelaba lemsatepogo.

Nagaland nung Taekwondo asaya terenlok asoshi tyari agütsüba aser team nongita yariba atema association-isa, Nagaland Taekwondo Association tir Master Pele Khezhe danga pelaba lemsatep. Nagaland team ya Team Manager T. Alem Aier aser Team Coach Seyievili Angami nati anir oa liasü.

World C'ship: Treesa Jolly-Gayatri Gopichand nati takok angu



Luroi/August 20, 2026 (Agencies): India tsür tarep asayar Treesa Jolly aser Gayatri Gopichand Pullela nati New Delhi nung tang asaya aliba World Championship nung maneni kanga junga asaya-a Brehostibarnü seventh seeds Rin Iwanaga aser Kie Nakanishi na tsükdaktsüogo.

Paronok ya BWF Tour nung tang agi tanabenbuba ang asayaogo. 2023 Indonesia Open nungbo Iwanaga aser Nakanishi nati game asem asayaba sülen takok ngua liasü. Küm asem sülen tang Treesa aser Gayatri nati mang yangogo.

Mezüngbuba game yabo Treesa aser Gayatri nati kanga timtem mesüi 21-16 agi kokatok. Tanabuba game tenzüker mapang tatsüka dang lir Japan nung tarap yagi menor challenge asüba atema India tsürla ana yagi tashishiba ka agütsü, saka tia ka-a Iwanaga aser Nakanishi nati iba point nguteta liasü.

Iba sülen break tashi nung Treesa aser Gayatri na 11-4 agi tejakdang liasü. Ajisüaka break sülen yimya shitak mebenshiba atema Treesa nem yellow card ka agüja liasü.

Osagbenertem den

sensaksemba mapang kechi nung aibeln ta asüngdang dang Treesa-i, "ni umpire dang shuttle sayu saka pai iba ya 'excuse' ka dang ta shia magizük aser kü nem card agütsü. Ajisüaka kecha masü, court telung nung iba amala ya odang ataloker," ta ashi.

Asaya tembangba sülen Japan tsürla ana ya kanga temulung raksaba nguogo, aser India tsürla ana yagi kanga nongshia asayaba tenati mekottetba nangzüka liasü.

Treesa aser Gayatri na taruba asaya fourth seeds Jia Yi Fan aser Zhang Shu Xian na den asayatsü. Tenati Fan aser Xian na ya asemben asayaba asembenprongla mekoki lir. Tarep ana tsüngda tatems February ita Badminton Asia Team Championships nung asaya koba India tsürla ana yagi 22-24, 18-21 agi makok.

World Championships nung medal kabosa angutsü atema Treesa aser Gayatri nati Hokolbarnü Fan aser Xian na den kanga junga asayatsü nüngdaker. Tetsür tarep asaya nung India tsürtemi küm 15 tashi medal ka danga nguteta mali.

Office of the OZÜKÜM TSUNGREMKETBA SEMCHIR MONGSENYIMTI

P.O Chuchuyimlang B.P.O Mongsenyimti - 798614
Dist : Mokokchung, Nagaland

KÜMREM PELAR

Ozü Ozüküm Tsungremketba Semchir jabaso asür Sp.Nokinyanger, yimla maliba tia tensa agi menepa 7th August, 2026 anogo nung tasüba ajuruba mapang Khar yimden, Arogo, lokti balala aser nijia shirnokisa ozü dak malangba rongsen aser nübo jenti agi yariogo nenok ajak dang kangasa pelar, iba den Mopungchuket Yimden aser Arogoi rongsen, nübo aser shisatsü nung yariogo nenok danga kangasa pelaba lemsateper.

Onok tsüngtong tonga marutetaka nenok dang temulung nung mesemi pelar aser ya ozü Tsüngremketba Aso asoshi mamashiba yimli tolu nenoki sayuogo ta iba zülü ajanga lemsateper. Tulusang Tsüngremi nenok lokti aser kija kibong balala molamoshia moajangma ta Ozü Ozüküm Tsüngremketba Aso sarasadem.

Sd/-
Wb. Sentinukshi
Tir

Sd/-
Sp. Tsungremketba Ozukum
Tongti Zülur

ICC Test rankings: Brook aser Bumrah na temaba jenjang nung lir



Luroi/August 20, 2026 (Agencies): ICC Men's Test Batting Rankings nung Harry Brook maneni No. 1 asayar kümogo aser India nunger pacer Jasprit Bumrah-a bowler tem rongnung temaba jenjangi tuogo.

Australia nunger opener Travis Head-i Bangladesh den mezüngbuba Test asaya junga masayatetba ajanga pa jenjang asem asepzüka aluba sülen Brook pa indang career nung tang agi pezübenbuba temaba jenjangi tuogo.

Bangladesh-i otsütsüsa Australia wicket teku agi akokba asaya nung Head-i innings ana nung run 22 aser 17 dang yanglua liasü. Iba ajanga batting rankings nung temelenshi adoka Brook temaba jenjangi tuogo aser pa sülen England nunger asayar Joe Root aser Australia nunger asayar Steve Smith tanabuba aser tasembuba nung lir.

Darwin nung Smith-i innings ana nung run 71 aser 44 yangluba sülen pai Head ajateta tasembuba nung lir.

Bangladesh-i takok anguba sülen asayar aika jenjang junga kümogo. Captain Najmul Hossain Shanto pa indang career nung tang mezüngbuba 20bubai tuogo. Pai mezüngbuba

innings nung kanga dang tongtibang run 84 yanglua liasü.

Mominul Haque-a jenjang pongu tejakdangi tua tang 31buba nung lir aser Australia nunger all-rounder Cameron Green 30buba nung lir. Shadman Islam-a jenjang asem tejakdangi tua tang 58buba nung lir aser Mehidy Hasan Miraz aser Tanzid Hasan na jenjang tajungba kümogo.

Bowling rankings nung Bangladesh nunger asayar Mehidy jenjang asem tejakdangi (24) tuogo aser Hasan Mahmud jenjang 26 tejakdangi tua tang 38buba tongtetogo.

Mahmud-i mezüngbuba innings nung wicket trok agi aser ajak senteper wicket teku agia liasü.

Kasa mapang nung Bumrah Sri Lanka den Galle nung masayaka pa Test bowler tem rongnung maneni temaba jenjang nung lir.

Afghanistan-i 4-0 agi Ireland akokba sülen ODI rankings nunga temelenshi adokogo.

Afghanistan captain Rashid Khan ODI bowler tem rongnung maneni temaba jenjang nung lir. Pai asaya pongu nung wicket 12 agi. Pa indang teammate Azmatullah Omarzai-a jenjang teku (19) tejakdangi tuogo, pai wicket ti agi.

BILEMDANGANG

"Taremkük agi yimjung adokdaksür."